

## Pelajar digesa berani menghadapi cabaran

**KUALA LUMPUR, Ahad** — Pelajar-pelajar harus berani bekerja sendiri, yakin akan kebolehan diri sendiri dan berupaya menghadapi cabaran tanpa bersandar sepenuhnya kepada Kerajaan, kata Datin Seri Dr. Siti Hasmah Haji Mohd Ali, hari ini.

Sifat berdikari itu harus dipupuk di sanubari setiap pelajar, katanya ketika berucap merasmikan 'Pasar Seni', anjuran Kajian Seni Lukis dan Reka bentuk, Institut Teknologi Mara (ITM), di Muzium Negara, di sini hari ini.

Menurutnya, pasar seni itu merupakan usaha positif untuk menggalakkan para penuntut berdikari.

Di samping memupuk semangat berniaga, sesuai dengan dasar Kerajaan meng-

galakkan Bumiputera mencebur diri dalam perniagaan, pasar seni itu juga dapat mendekatkan masyarakat dengan seni," tambahnya.

### Sokongan

Datin Seri Dr. Siti Hasmah seterusnya berkata, sokongan moral masyarakat terhadap seni amat menggalakkan, tetapi sokongan moral saja tidak mencukupi.

Katanya, "sokongan bercorak material sangat perlu bagi menggiatkan lagi usaha para pelukis dan pereka di tanah air."

Sementara itu, Pengarah ITM, Encik Nik Abdul Rashid bin Nik Abdul Majid memberitahu, ITM telah merancang mengadakan sebuah balai seninya sendiri yang bernama 'Pusat Daya Cipta'.